

A Monthly Newsletter of JSBA

THUHRETU

Vol. XXX; Issue No. 2

July, 2021

“Kawlkil thleng pawhin ka THUHRETUTE in ni ang”.



**Evan Lalngaihawma leh a kohhran te
(Boiragi Hathai Baptist Church)**

EDITORIAL BOARD

Editor

Laltiana Chawngthu

Joint Editors

Malsawmhlua Ralte
Malsawmzuala Ralte

Circulation Manager

Lalpianmawia

Members

Upa Lalchhuanawma Khiantge
Lalpinpuia Tochwang
Lalrinchhana
Lallawmkima Ralte
Lalchawiliana

Thu awm te:

1. Editorial
2. Sermon:
Pathian nena len dun 1
3. Missionary report:
Evan. Lalngaihawma 4
4. Whatsapp Titi 5
5. Kohhran Report 6
6. Ringtute Chaw 9



Hripui leng avangin Pathian Chibai bûk inkhawm te leh kohhran thil tikhawm hrang hrangte tih theih a ni ta rih lova. Kan boruak tawn meka kan tawngkam lar tak chu 'Kan chau, kan ro' tih hi a ni awm e. A dikna chen thui tak a awm ang.

Mahse, hei hi erawh i inzawt theuh ang u. Thlarau nuna chau leh ro te tan tlukluhna tur chu tu nge? Chau leh ro tak tak nia inngaite chuan eng nge kan tih ang a, tu nge kan pan ang? A chhanna chu kan hre vek awm e.

Thlarau nuna chauhna leh ro-na te hi ringtute ten kan tawn ve tur a nihna chen a awm ve a. Engtiang chiahin nge Pathian hi kan rina? Eng chen chiah hi nge a tan kan huam? tih hi, kan hun harsa tawn hian a tilang Chiang thin.

Kan Pathian hi, a hrehawm ber, a harsa ber, a na ber, a hlauhawm ber, kan tawh lai pawha belh tlat tlak Pathian nung, Engkimtithei a ni e.

Contact: e-mail: jsbaoffice@gmail.com

Editor: 9612547909; Jt. Editors: 8787504181/9366013167

Circulation Manager: 9862455264



PATHIAN NENA LEN DUN
(Ringtu nun kailawn hmasa ber)

~Lalhnehzova Royte

Bible chang thlan : Mika 6:8, Genesis 2:7; 3:7-10

Mizote hi camping, crusade leh rammute tih ang chi uar tak mai kan ni a, kan rik deuh hut loh chuan kan awm a nuamlo tlat thin. Heng hunte hi pianthar nan, siamthar lehna chan nana hun tha tak niin kan hlim thin hle. Chutianga Pathian thlarau thianghlim pawl tharna kan chan chuan inkhawm kan chak a, hma takah kan kal a, kan lam a, kan tawngtai rual a, a huhova awm khawm kan chakin kan nghakhlel em em thin. Mahse chuti taka camping/ crusade/ rammute nei ngun si hi engatinge kan nun a tlo loh fo thin a, engatinge kan daih rei theih miahloh tih hi zawhna pawimawh tak chu a lo ni ta. A chhan chu he kan ringtu nunin siamtharna emaw piantharna a chan hian a huhova Biak Ina zaia lamah te hian kan duhtawh mai thin a, mahse chu ringawt chuan a lo daih rei bik si lo va, kan tla fal a kan hniam leh rawih rawih thin. Chutah tak chuan alawm tihhmaih lian tak kan neih thin ni.

Pathian nena len dun:

Ringtu, mi pianthar kan niha kan tih hmasak ber tur chu Pathian nena len dun hi a ni. Chu chu ringtu nun kailawn hmasaber chu a ni a, chumi kal kan chuan a huhova thiltih khawma hlim reng kan tum leh mai thin. Pathian nena leng duna fianriala Lalpa nen inpawl na neia kan chhunga thlarau thianghlim awm chu chhem alh zel tur kan nih laiin, camping/ crusade vela kan chan kha kan ring ta ngar ngar thin a, chhawm nun loh chuan rei a alh thei bik lo a ni.

Engtin nge Pathian nen kan len dun ang?

Kan hriat hnu, a tha kan tih em em pawh hi kan zawm si loh chuan sawi nawn fo a ngai leh thin. Pathian nena kan len dun theih dan tur kawng awlsam tak pahnih chu **Bible chhiar** leh **tawngtai** hi a ni. Bible hi ringtute tan chuan kalkawng min hrilhtu (Map) a ni a, chumi chhiar ngailo chuan

kalna tur dik leh diklo te, tha leh thalo te, tihtur leh tihloh tur te a hre thei lovang. Chu bakah chuan he kan Bible hmang hian Pathianin a mite thinlungah thu a sawi thin bawk. Tawngtaina hi Pathian kan biakna, Pathian nena kan inbiak tawnna pawimawh tak a ni. Thlemnaa kan luhloh nana tawngtai turin kan Bible chuan min ti bawk. Lal Isua chuan pindan chhungrilah luta, a ruka awm Pathian hnena tawngtai turin min hrilh a (Matt. 6:6), hei hi tawngtai rual a khapna ni lovin, chung zawng zawng chu ti mahila a falin fianrialah Lalpa hnenah tawngtai thin rawh u a tihna tluk a ni.

Pathian nena len dun rah:

Kawng hrang hrang sawi tur a awm ang, mahse tun tumah chuan ringtu nuna pawimawh em em kawng hnih chauh kan sawi dawn a ni.

i) Sual hnehna: Ringtute chu thlemna tawk thin leh tawk tur kan ni. Nitin hian beih kan tawk thin a, chu chu hneh a ngai a ni. Sual/Thlemna hneh tur hian chau ngailo, tlu ngailo khawpa chak ni a eng rau emawni chan kher a ngai lo. Nitin Pathian nena leng dun thin te chuan “Chakloh ber lai pawn ka peng ngamlo” tiin thlemna chu an hneh mai zawk thin.

ii) Rawngbawlina nung neihna: Rawngbawlina nung leh nunglo hi nihna in a hril lo tih hi kan hriat hmasak atan a va tul em. Hruaitu nihna chanvo hrang hrangte hian thlarau nun sanna a keng tel lo va, a chhawm thei heklo. Rawngbawlina peng hrang hrang chu eng ang pawhin kan hlenchhuak thei ang, mahse a nun leh nun loh hi a pawimawh si avangin rawngbawlina nung nei tur chuan rawngbawltu chu Pathian nen an leng dun thin tur a ni.

Tlangkawmna:

Mi tamtak chuan kan ringtu nun chak leh chakloh hi midang kutah kan ngat a, Pastor, Kohhran upa leh kan awmna Department hruaitute kutah te emaw kan ngat fo thin. Kan dai soal a, kan tlu a, mahnia thawh leh mai tumlo, hruaitute kaihtawh kher phut tlat te kan awm thin, hei hi a dik lo va, Pathianah kan inngat zawk tur a ni. Mahniin Pathian kan buan ve ang a, fianrialah Lalpa pawlna hun kan hmang ve tur alawm,

THUHRETU, JSBA Monthly Newsletter, July 2021

chu chu ringtu nuna kailawn hmasa ber, kan tihmakmawh chu a ni. Mahni chauh pawha hlimna te, thlamuanna te, lungawina te hi chutah chuan a awm a ni.

An chau ngailo a ni bik chuang hleinem, mahse an tlu ve mai mai lo. Harsatna te hi an tawklo a ni hleinem, hneh tura chakna an nei tawh zawk thin.

Engatinge programme tam ang hua kan nun chhuah leh thin loh? tih hi zawhna lian tak a ni. A chhan chu Pathian nen kan leng dun ngailo alawm. Kan inkhawm a, kan hnattlang a, hla kan zir a, tih tur hrang hrang kan ti a, kan indah tha ta em em thin a ni.

Ringtu hmasawn ni a, rawngbawlina nung nei turin ringtu nun kailawn hmasa ber atang hian i rap tan leh ang u. Pathian nen i leng dun thin ang u tiin chhiartu zahawm takte Pathian hmingin kan insawm a ni. Lalpan malsawm rawh se.

JSBA MEDIA & PUBLICITY SUB-COMMITTEE ATANGA NGENNA

JSBA Media & Publicity Sub-Committee chuan hetiang hian rawngbawlina a kalpui mek zel a:

♦ JSBA Youtube channel siam thar a ni a, JSBA Official tia dah a ni. He channel hi lo subscribe theuh turin kohhran mi zawng zawngte kan inngen e. Kan ta a nih angin, he channel kaltlanga rawngbawlina te ngaihlu a, lo thlir thin turin kan insawm e.

♦ Thuhretu Editorial Board siam tharin, thuziak rawngbawlina lamah hma lak mek a ni a. Ngun taka Thuhretu lo chhiar a, a tul ang zela thurawn pe turin kohhran mite kan inngen e. Thuziah lamah pawh tan la turin kan inngen a, sermon, testimony, report, etc. te ziak turin kan inngen e.

MISSIONARY REPORT

~Evangelist Lalngaihawma~
Boiragi Hathai Baptist Church.

Vawiin ni thlenga a khawngaih rawngbawl hna thawk theia min kotu Pathian chungah leh thahnemngai taka min tawngtaisaktu kohhran mipui zawng zawng chungah lawmthu ka sawi e. Kohhran mipui zawng zawng te tho leh Lal Isua hmingin chibai ka buk a che u.

Boiragi Hathai Baptist Church, Udaipur Baptist Association (Sonamura Area)-ah ka thawk mek a. Boiragi Hathai Baptist Church hi May ni 18, 2018 khan din a ni a. Tunah hian kohhran member puitling 63, naupang 41, kan vaiin mi 104 kan awm mek a ni.

Kohhran hmalakna leh rawngbawlna tlangpui te:

- Khawtlang tifaiin social work kan nei thin.
- Kumin chhung tawngtai tlaivar vawi 5 neih tura ruahman a ni a, vawi 3 kan nei tawh.
- In leh a vel vawngfai turin Kristiante inzirtir thin a ni.
- Zirna-a hma kan sawn theih nan Awareness neih a ni.
- Sports Meet kan nei thin.
- Kumin atangin Biak In thar sakna tur Building Fund kan kalpui.
- Kumin chhungin ringlomi chhungkaw 10 kan target a, hruaitute nen Home Visit kan nei thin. Kristian leh Kristian lo zingah tanpui ngai an awmin kohhran huapin tanpuina kan nei thin.
- Leadership Training kan nei thin a, a bik takin Office Bearers-te , an chanvo leh mawhphurhna inhrilh hriatna leh zirtirna kan nei thina, Committee Member-te mawhphurhna leh chanvo inzirtirna kan nei bawk.

Pathian khawngaihna azarah Covid-19 hri leng mek avangin kohhran hmalakna tibuai leh Biak In khar tur khawp chuan min la nghawng ve lem lo. Sorkar dan zawm chung zelin kohhran hmalakna leh rawngbawlina chu kalpui reng a ni. Khawtlang pawh hri hian min la tibuai lova, kal pangngaiin kan la kal thei zel a ni. Heng zawng zawngte hi JSBA kohhrante tawngtaina avang a ni a, hma lam hun zel atan pawh min lo tawngtaipui chhonzawm zel turin ka han ngen mawlh mawlh che u a ni.

Kan report-te a famkim lovang tih ka ring a, amaherawhchu he report atang hian chhiartu zawng zawng ten JSBA kohhrante rawngbawlina leh tawngtaina Lalpa'n mal a la sawm ve zel a ni tih kan hriat thar a, Chanchin Tha meichher chhi-a puang zel turin kohhran hote hmalam min pantirtu a lo nih thar leh theih nan, Lalpa'n malsawm vek che u rawh se. Amen.

JSBA LEH A KAIHHNAWIH Whatsapp Group TITI

←  JSBA LEH A KAIHHNA...  

PP Lalrinzuala

Pathian nena lëndun.

Pathian nena lëndunna (fianrial) hun hman loh hi sual dang eng emaw va tih kherloh pawhin, “a paw!” a ni mai lova, **hnungtawlhna** lian tak a tling tawh sa reng a ni.

Pathian nena lëndunna hun hman loh pawha kan khua a har vak loh chuan inenfiah hle a tul tawh tihna a ni. Nun hi Pathian tellova hman tura duan a nih loh avangin Pathian ngaihsak hman lèk lova hun hman ngawt mai hi **Pathian zahlohna** a tling thei ang.

Ringtu (Kristian) chu Pathian nen an lêngdûn thin.

 |Type a message   

Hetiang hian, JSBA Whatsapp Group-a thu post, tawi leh tha te hi a remchan dan angin dah thin a ni ang. -Editor

KOHRAN REPORT:

Hmawngchuan Kohran:

Pathianni zing Sunday School Class leh Pathian ni zan sermon hi Vestry atanga neih thin a ni. Pathianni thawhlawm hi Pathianni apiangin Bialtu Upate'n mahni bialah lakkhawm thin a ni. Kohhranin sum tuak nan hnatlang neih thin a ni. Kohhran ni pawimawha lehkhah chhiar chhuah tur emaw Sermon thupui tur awm te hi Vestry atangin puanchhuah thin a ni. A khat tawkin Sunday School Class leh zan lam sermon hun hi Bialtu Pastorin Vestry atangin a hmang thin a, Zing Tawngtai hi la neih chhunzawm zel a ni.

Online thawhlawm lilam - thlai leh suma chang thei thilte Kohhran Secretary hnenah dahkhawmin, heng hi Kohhran Whatsapp Group kaltlangin zan lamah lilam thin a ni. Ni 11.07.2021 Pathianni khan Thlai thar Kut an hmang. Kohhran hnuaia Dept.hrang hrang - BKHP, TKP, BMP leh BNP te pawhin anmahni zawnah a theih dan kawng kawngin hmalakna an nei thin.

Hmunpui Kohhran:

Covid-19 thawh hnihna avangin Hmunpui Kohhran Committee meeting May ni 2, 2021 a neihah Kohhran leh a hnuaia department inkhawm a tihtawp rih a ni a, wawiin thlengin inkhawm a awm lova, amaherawhchu zing tawngtai inkhawm erawh hman chhunzawm a ni.

Kohhran inkhawm zan apiangin inkhawm dar vuak niin chhung inkhawm nei theuh turin kan inngen a, chhungkaw engemaw zat chuan tihhlawhtlin a ni. Kohhran Committee-te inkhawm khar atanga wawiin thlengin Pathianni chhun dar 12 ah biakin a kalkhawmin tawngtaihona neih thin a ni.

July ni 4 atang khan BNP atangin BZP leh Intermediate ten Sunday School an chhunzawm leh a, tin Inrinni zan leh Pathianni zan ah Kohhran hruaituten a inchhawkin Biak In atangin Thuchah an puang thin. Zan lamah BKHP-ten Bible chhiar chhuah programme an nei mek a ni.

Zion Kohhran:

Hun eng emaw ti atang khan, Pathianni zan a piangin Kohhran Committee-ten fimkhur takin Mual Rawngbawl na an nei thin, Pathian ni apiangin Upa Bial tinah Thawhlawm khawn ziah thin a ni.

Bangla Zion Kohhran:

Kohhran Upa-ten an bial theuhah thlatin PRZ leh inkhawm thawhlawm lak khawm thin a ni. Thlaithar te online hmang in an lilam thin. Ni 4/7/21 zan khan BKHP-ten khelmualah, mahni tu leh fate tan tawngtairualna an nei. Ni 27/6/21 Baptisma, Nauhlan leh Sacrament Service neih a ni. Ni 30/5/21 khan Bialtu Pastor-in kohhran intinah tawngtaina hun a rawn hmang. Kohhran huan sama hnatlang neih a ni. Zing tawngtai kalpui chhunzawm zel a ni. Unit TKP lam pawh remchan ang angin sumtuak hnatlang neih thin a ni. Kohhran Committee-ten khawtlang tana tawngtairualna hun hman a ni.

Tlangsang Kohhran

Kohhran Inkhawm zan leh Pathianni zing apiangin Biak In dar vuak a ni a, he hunah hian

chhungtin-ten Chhung Inkhawm a rualin neih thin a ni a, nitin Chhungkaw Maicham hmang hi chhungkaw engemaw zat an awm a ni. BNP atangin BZP leh Intermediate Department-ten Pathianni chhunah thuzir leh counselling class neih thin a ni. Kohhran-ten Huan hnatlanga sam/kah a ni. Upa Bial ten Bial budget an neih te hnatlangin an tuak bawkhin.

Phuldungsei Kohhran

May ni 1, 2021 atang khan a huhova inkhawm an nei ta lova, zing tawngtai erawh chu an nei. Dar hi kohhran inkhawm hun angah hian tihrik thin a ni a, chhungtinten a remchan dan azirin tawngtairual, thuchah inkhawm an nei thin. Thawhlawm hi Pathianni zing, Sunday School kal hun awm velah hian Biakinah dawh a ni a, chhungtinten mahni remchan hunah an dah mai thin. Hun engemawti chen chu khawnkual thin a ni a, hripuiin min chenchilh ve chinah khan khawn lovin Biak Inah an dahkhawm thin.

Thlai thar thawh duh ten Kohhran Whatsapp group ah an pholanga, kohhran miten an

chhang thin. Tun dinhmunah hian hri kai, an kohhran atangin mi engemawzat awmin, a then Quarantine Centre-ah leh mahni inah te awmin hripui hian a chim buai mek. Tawngtaipui an mamawh hle mai. Tun dinhmunah ngaihtuahawm lutuk erawh an awm rih lo.

Vanghmun kohhran

Covid 19 thawh hnihna a lo thlen leh tak avangin May ni 1 inrinzan atangin kohhran leh a hnuaia Dept. Pathian biak inkhawm leh zing tawngtai inkhawm chu sorkar lam thuchhuah te thlirin khar rih a ni. A remchan leh theih ang ang thil tul alo awm chuan Committee meeting erawh chu neih thin a ni a, kohhran leh Sub- Committee-te hmalakna tur pawh siam a niin hma pawh lak ve zel a ni. Pathian Ram thilpek erawh chu Upa bial theuhah bialtuten lakkhawm reng a ni . Kohhran Prokrem Committee-ten kartin kohhran inkhawm hun apiangah chung tinten kan hman tur prokrem siamin kohhran whatsapp group-ah tarlan thin a ni, prokremah hian hla sak , Bible chhiar tur, tawngtai rual thupuite tarlan a ni a, chawlhni zing leh zan lamah hian

thawhlawm pawh neih thin a ni, hei hi bialtuten PRZ lakkhawm pahin an la khawm thin. BNP lam tan BZP leh Intermediate Dept.te Chawlhniah an Zirtirtuten SS Class an neipui thin. Kohhran inkhawm neih theih a nih tak loh avangin nikum atang khan thlai tharte Whatsapp kal tlangin online a lilam thin a ni a, nitin thlai thawh awmin a leitu lamin thahnem an ngai bawk a, thlai lilam atang hian sum tam tak hmuhchhuah a ni. Kohhran huanah kuhva engemawzat phun luh belh a ni, Biak in chung pawh pulpit hnung bang chei thar a ni a, hmalakna hrang hrang engemawzat kalpui lai mek a awm bawk.

Kan ngenna ngai pawimawhin kohhran pasarih atangin report kan dawng a, lawmthu kan sawi e. Report la pe ve lo kohhrante hi August thla chhuakah chuan report pe ve turin kan beisei e. Thuhretu hi hi kohhrante kan intihchak tawna leh inpawh tlanna tur a nih angin, kohhran rawngbawlina leh hmalakna hrang hrangte theh luh (*report*) kawngah thahnemngai turin kohhran-te kan innge e. -Ed.



Ringtute Chaw

Chhiar tur: Psalm 43

July ni 16, 1999 khan thlawhtheihna lian lo tê, John F. Kennedy-a khalh chu Atlantic Tuipui-ah a tla a. Kha chhiatna thlen chhan kha a chhuitute chuan, *spatial disorientation* vang a ni a, hetiang hi thlawhtheihna chet sual chhan a ni fo mai, an ti. Khaw hmuh theih chin a tawi hian, thlawhtheihna khalhtute hi an awmna hmun leh pan lam hre lovin an buai thin a, tluang taka an tum ram hruai thleng theitu thlawhtheihna khalhna hmanruate chu hmanna chang hre lovin an chi-ai thin a – hei hi *spatial disorientation* an tih chu a ni.

Hringnun thlipuiin min nuai a, harsat manganna kan tawh chang hian, mahni awmna hmun Chiang lo leh mahni pan lam pawh hre chang lo hian kan chi-ai buai fo thin. Cancer, lusunna, retheihna, phatsanna, hripui... hringnuna beisei loh chhiatna hian min tichiaiin, min hruai bo fo thin.

Hetieng dinhmuna kan din hian Sam 43-na hi kan Tawngtaina ni se a duhawm ngawt mai. He Sam ziaktu hi sual leh rorelna dik lovin nasa takin a chim buai a. Mangang taka Pathian ngenin, a dinhmun tawn mek harsatna atanga a tum ram dik tak him taka hruai thleng theitu awmchhun **Pathian awmpuina** dilin a tawngtai a ni (Chang 3 & 4). Pathian awmpuina hnuaiah chuan beiseina thar leh hlimna thar a chang dawn a ni tih Sam ziaktu hian a Chiang em a ni.

Eng kaihhruaina nge Sam ziaktu hian a dil le? Pathian Thutak leh Eng hmanga A Thlarau Thianghlim awmpuina a dil a ni.

Ringtu nun kawnga harsatna tawka i tal buai a, i awmna hmun leh i pan lam pawh hre lova i chi-aiin changin, a Thlarau Thianghlim hmanga Pathian awmpuina leh hruaina chuan a thlamuan thei che a, i kawng a êntu a ni thei.

To,

**JSBA Printing Press-ah hian
Colour leh Black & white printing
chi hrang hrang -
Thlalak, Lehkhabu, Citation, etc.
kan ti thei e.
Min rawn pan ve rawh le.**

Contact: 9612138528/9366013167

**Edited & Published by
THUHRETU Editorial Board
on behalf of
Jampui Sakhan Baptist Association.
Printed at JSBA Printing Press
Vanghmun, Jampui Hill.**
